



Broj: 05/1-50-13-29-19-3/16  
Sarajevo, 19.4.2016.

## ZAPISNIK

### 19. sjednice Nezavisnog odbora Parlamentarne skupštine BiH

Sjednica je održana 19.4.2016., s početkom u 17 sati.

Sjednicu je sazvao Žiko Krunić, predsjednik Nezavisnog odbora.

**PRISUTNI ČLANOVI NEZAVISNOG ODBORA:** Žiko Krunić, predsjednik Nezavisnog odbora, Enes Obralića, prvi zamjenik predsjednika Nezavisnog odbora, Mato Jozić, drugi zamjenik predsjednika Nezavisnog odbora, Adisa Begić, Nikola Džambas, Mate Miletić, Ljubomir Kuravica, Miroslav Škorić, članovi Nezavisnog odbora.

**ODSUTNI ČLANOVI NEZAVISNOG ODBORA:** Ilma Mehić-Jusufović, članica.

**OSTALI PRISUTNI:** Ivana Lovrić, koja obavlja poslove sekretara Nezavisnog odbora.

Sjednicu su pratili i Zoran Brkić iz Sektora za odnose s javnošću Sekretarijata Parlamentarne skupštine BiH, Ljerka Bojić, rukovoditeljica Sektora za druga parlamentarna tijela, te Dijana Šatara, predstavnik OHR-a.

Sjednicom je predsjedavao predsjednik Nezavisnog odbora Žiko Krunić.

Konstatirajući da postoji kvorum za rad, otvorio je 19. sjednicu Nezavisnog odbora Parlamentarne skupštine BiH.

Nezavisni odbor jednoglasno je usvojio sljedeći

## DNEVNI RED

1. Usvajanje Zapisnika 18. sjednice Nezavisnog odbora;
2. Usvajanje Izvještaja o posjeti Državnoj agenciji za istrage i zaštitu BiH;

3. Razmatranje Inicijative za pokretanje disciplinskog postupka protiv direktora Direkcije za koordinaciju policijskih tijela BiH;
4. Tekuća pitanja.

#### **Ad.1. Usvajanje Zapisnika 18. sjednice Nezavisnog odbora**

Zapisnik 18. sjednice Nezavisnog odbora usvojen je jednoglasno, bez primjedbi.

#### **Ad.2. Usvajanje Izvještaja o posjeti Državnoj agenciji za istrage i zaštitu BiH**

Predsjednik Nezavisnog odbora Žiko Krunić dao je riječ prvom zamjeniku predsjednika Nezavisnog odbora Enesu Obralići koji je ukratko informirao članove Nezavisnog odbora o sastanku s rukovodstvom Državne agencije za istrage i zaštitu BiH. Sastanak je održan 14.3.2016. u prostorijama Državne agencije za istrage i zaštitu BiH kojem su, osim njega, prisustvovali i Mate Miletić i Ljubomir Kuravica, članovi Nezavisnog odbora.

O ovom sastanku sačinjen je Izvještaj koji je jednoglasno usvojen, bez primjedbi.

#### **Ad.3. Razmatranje inicijative za pokretanje disciplinskog postupka protiv direktora Direkcije za koordinaciju policijskih tijela BiH**

U uvodu u ovu tačku dnevnog reda predsjednik Nezavisnog odbora naglasio je da je ova tačka na dnevnom redu 19. sjednice u skladu sa usvojenim prijedlogom prvog zamjenika predsjednika Enesa Obraliće sa 18. sjednice da se inicijativa za pokretanje disciplinskog postupka protiv direktora Direkcije za koordinaciju policijskih tijela BiH razmatra na prvoj narednoj sjednici Nezavisnog odbora. Također, predsjednik je napomenuo da je inicijativu za pokretanje disciplinskog postupka protiv direktora Direkcije za koordinaciju policijskih tijela BiH Nezavisnom odboru uputio i ministar sigurnosti BiH o kojoj će se Nezavisni odbor i izjasniti. Predsjednik Nezavisnog odbora otvorio je raspravu o ovoj tački dnevnog reda u kojoj je učestvovala većina članova. Nakon rasprave, pristupilo se glasanju nakon kojeg je, s tri glasa „za“, dva „protiv“ i tri „suzdržan“, konstatirano da inicijativa nije dobila potrebnu većinu.

#### **Ad.4. Tekuća pitanja**

U okviru ove tačke dnevnog reda predsjednik Nezavisnog odbora Žiko Krunić je, u skladu s članom 7. stav (1) tačka b) Zakona o nezavisnim i nadzornim tijelima policijske strukture

BiH i članom 9. tačka b) Poslovnika o radu Nezavisnog odbora, predložio izmjene Poslovnika o radu Nezavisnog odbora, a sve s ciljem otklanjanja blokade u radu ovog tijela.

Izmjene bi se odnosile na član 16. Poslovnika o radu Nezavisnog odbora, i to:

Stav (1) Policijski rukovodilac ili zamjenik rukovodioca policijskog tijela BiH ne može biti suspendiran ili smijenjen bez prethodnog prijedloga Nezavisnog odbora, **osim u slučaju iz stava (3) ovog člana (stav (3) je novi stav).**

Stav (2) ostaje neizmijenjen.

Dodaje se stav (3) koji glasi: „U slučaju da Nezavisni odbor ne usvoji ponovljenu inicijativu za suspenziju ili smjenu koju je podnio ministar sigurnosti, Odbor je dužan u primjerenom roku, ne dužem od 15 dana, inicijativu ministra proslijediti Vijeću ministara BiH na nadležni postupak i odlučivanje, uz obrazloženo izjašnjenje koje ne obavezuje Vijeće ministara prilikom donošenja odluke.“

Dosadašnji stav (3) ovog člana postaje stav (4), a stav (4) postaje stav (5), dok se dosadašnji stav (5) briše.

Predsjednik Nezavisnog odbora otvorio je raspravu o ovom prijedlogu. U raspravi je učestvovala većina članova. Prvi zamjenik predsjednika Enes Obralića istakao je da pozdravlja ovu inicijativu predsjednika, ali smatra da u ovako kratkom roku i bez prethodne analize nije moguće vršiti izmjene Poslovnika o radu te da je prvo potrebno mijenjati Zakon o nezavisnim i nadzornim tijelima policijske strukture BiH pa tek onda Poslovnik o radu Nezavisnog odbora. Smatra i kako ovo treba biti predmet rasprave na sljedećoj sjednici.

Drugi zamjenik predsjednika Mato Jozić je, također, pozdravio inicijativu predsjednika, ali smatra da predsjednik i dva zamjenika trebaju u naredna dva dana da usaglase izmjene Poslovnika o radu Nezavisnog odbora i nakon toga ih upute u daljnju proceduru.

Nakon rasprave, pristupilo se glasanju o prijedlogu predsjednika Nezavisnog odbora Žike Krunića te je, s tri glasa „za“, dva „protiv“ i tri „suzdržan“, konstatirano da prijedlog nije dobio potrebnu većinu.

Predsjednik Nezavisnog odbora Žiko Krunić zaključio je sjednicu u 19,40 sati.

**SEKRETAR**  
**NEZAVISNOG ODBORA**

Ivana Lovrić

**PREDSJEDNIK**  
**NEZAVISNOG ODBORA**

Žiko Krunić